

全  
浙  
詩  
話

全浙詩話卷四十九

會稽陶元藻篁村輯

男

廷珍

編次

廷琬

仁和朱文藻映濬

參訂

同邑宗聖垣芥颿

國朝

梁夢善

夢善字午樓錢塘人文莊公弟

隨園詩話

梁文莊公弟夢善字午樓年十五舉於鄉

六上春闈不第出宰蠡縣非其志也年過四十而卒出

都一首便覺不祥其詞云何處人問有雁聲莫雲無際  
且南征西風禾黍臨官道落日牛羊近古城生意漸如  
衰柳盡浮生只共片帆輕勞勞踪跡年年是淒絕天涯  
此夜情味熏爐云夢去恰疑懷墮月抱來錯認玉爲烟  
飲沈椒園太史家云微吟韻許追前輩中酒身還耐薄  
寒述懷云洗馬清羸潘令鬢外人剛認一愁無皆清詞  
麗句楚楚自憐亦有壯語如出塞不辭三萬里著書須  
計一千年恰不多也

沈謙之

謙之湖州人孝廉著竹翠溪堂詩集

隨園詩話補遺 竹翠溪堂詩集中有卽席贈嚴崧瞻  
進士云萍浮梗泛得相親酒賦琴歌不厭頻君莫傷時  
悲不遇世間多少布衣人釣臺云王氣終應在茂林菟  
肩麥飯記飄零故交貧賤如相忘帝座何由犯客星二  
詩皆有寄托足以風世又謝僧餉茶云幽絕精藍莫記  
名到門惟有老僧迎烹茶不是在山水那得一杯如許  
清五言如鷗隨遠山沒帆帶夕陽飛離情花落後春病  
雨聲中水濶疑無岸雲昏不辨山皆佳句也

沈榮昌

榮昌字永之謙之弟

隨園詩話

姚中甫方伯與沈永之觀察本中表親姚

姊嫁沈二人年少時與余同肄業書院每見方伯家遣  
僮擔盒供其子壻二人同登鄉會科沈寄姚詩云辛勤  
二老訓喃喃愛壻猶如愛長男甘脆每教常健飯苦吟  
猶記許分甘沈殿試二甲第三姚二甲第二白後官階  
沈必差姚一級姚爲觀察沈爲太守沈爲觀察則姚爲  
方伯矣沈又寄詩云平生每好居人後今日還應讓弟  
先余將赴廣西金撫軍之聘姚賦詩相留曰就使將軍  
重揖客何如南國有詞人後四十年姚宦巡撫廣西余  
寄書云不料當日所謂將軍卽此時之閣下惜我不能

來作揖客耳永之在書院寄內詩云深院蝶嬌無語坐  
小園花嫩卷簾看爲掌教楊文叔先生所賞

許惟枚

惟枚字鐵山海寧人

隨園詩話 海寧許鐵山惟枚與余同官金陵一時有  
二枚之稱余已薦牧高郵而許猶有待意有所感和余  
河房宴集詩云珠簾斜捲晚風前楊柳蕭疎隔岸烟一  
樣樓臺都近水向南明月得來先

湯聘

聘字莘來號稼堂仁和籍諸暨人乾隆丙辰進

士歷官湖北巡撫

越風 稼堂重遊東臯詩小橋隔岸時通馬細柳如烟  
不礙鶯其句頗似放翁

隨園詩話 湯中丞莘來聘湖上云小橋隔岸時通馬  
細柳如烟不礙鶯徐芷亭方伯垣荊州云帆檣影帶巫  
陽雨草樹聲含鄂渚秋二人不以詩名而風調頗似中  
唐

成城

城字衛宗仁和人官至觀察

隨園詩話 同年成衛宗宰南安小婢春桂於後園獲

石印文曰忠孝傳家成題云孔龜張鵲難重覩此石摩  
挲亦頗宜愧我平生期許在儘教世守作良規余宰江  
寧時聘史茗湄爲記室成識之於署中後爲臺灣司馬  
史館馮觀察家相見甚懽秩滿將西渡留別史云卅年  
舊雨各西東忽漫相逢大海中自是壯懷同作客不堪  
衰鬢已成翁世情轉燭貧交久物態浮雲老眼空他日  
故園應聚首一樽相對話松風

潘 涵

涵字字情杭人

隨園詩話

杭州潘涵字字情宰六合以循吏稱兩子



早卒家竟絕嗣甚矣天道之難知也僅錄其隨園小集  
云安住林亭遠放舟境隨人轉水隨鷗好山剛近長江  
口老屋深藏大樹頭叱馭原同招隱別買園先爲種花  
愁解還罍綬銅章貴換得繁英與素秋香名弱冠飲都  
城北志空山蹻蹻行陶令穫田償酒債敬姜操績伴書  
聲漁童歌好垂絲聽長者車來拂袖迎一片倉山梅影  
水回頭還比玉堂清西亭北榭門闌干閣引天風獵獵  
寒舊約飛魚傳去杏新詩走馬借來看風生咳吐追唐  
調禮失威儀謝漢官笑我熱中心未死偷閒來弄釣魚

竿

董潮

潮字東亭陽湖人占海寧籍登第官庶常

炙硯瑣談 余同年董庶常東亭潮陽湖人占海寧籍  
登第詩才沈博絕麗爲嘉禾八子之冠在京師時嘗晚  
步近郊瞥見姝麗彈琵琶甚哀潛誌其處翌日訪之但  
古塚纍然荒榛彌望心竊自駭諱不敢言又數數夢游  
地府讖多不祥歲甲申請假歸葬其先人未幾竟卒金  
以詩哭之有垂死未忘封馬鬣他生應更會龍華及紅  
袖琵琶摧玉樹青山泉石葬瓊華句蓋紀實也其從弟  
惠疇思駒亦少有雋才如黃鸝幾樹村依澗蛺蝶一雙

人閉門詠春草句也

蔡履元

履元字梵珠石門人官侍御

炙硯瑣談

石門蔡侍御梵珠

履元

書法負盛名詩不多

作余都門旅邸頗擅烟水之勝諸同人賦秋興詩蔡亦和云暑退涼生籬風來樹有聲時惟秋寂爽人得氣之清朗抱開佳境孤吟破宦情祇應寥廓外鸞鶴與同塵詩不以鍛鍊爲工亦自合格

胡驥

驥字上樞山陰人太學生

越風 上樞有贈澳上人詩云更別西湖歲又除過江  
冰雪映清癯諸天不夜燈千級萬象難空飯一盂馬麥  
舊緣何日了鶴林新偈未應無隔溪陶令閒居在欲遣  
門生舁笋輿讀第四句如見搬柴運米之忙令人失笑  
覺晨鐘暮鼓無非烟火叢林也

張永祚

永祚字景韶杭郡庠生後爲欽天監博士

湖墅詩鈔 張景韶通天文學學使王公試勾股得入  
郡庠後以天文生爲欽天監博士乾隆壬戌甲子兩蒙  
召見 賜大緞洵異數云景韶兼工畫山水亦能詩

嘗作聞笳詩云夕陽挂城頭城上笳吹起須臾月魄浮  
人在秋聲裏

潘作梅

作梅字繡野安吉人官海寧訓導

愛日堂吟稿 贈吳興潘繡野學博詩云西河詞宿數  
文雄鬻舍清齋臭味同却幸海天深化雨何因講席次  
春風名高翰苑文章在盤照先生首藉空媿我嬾成嵇  
叔夜漫勞青睞振飄蓬秀朗風神心自傾恍同裴楷王  
山行丹臺凡卜三生異外史官銜一樣清賦出詩篇追  
俊逸興來筆勢妙縱橫前身可是貞居子吏隱還遺物

外名自注云君爲予言昔請呂祖降壇云汝前身乃張伯雨也因誦外史詩從稱外史是官銜句令秉鐸海昌時謂此官爲外翰將無同耶爲之一笑君善書深得外史筆意

侯嘉縉

嘉縉字夷門臨海人貢生爲上元縣丞、

沐雲詩話 秦劍泉云吾嘗讀侯夷門詩石斧斫寒冰石裂無紋理真奇峭突屺更覽其潭柘寺詩云一水淡於畫空山或有人又覺其深情綿邈幽致動人

丁敬

敬字敬身自號鈍丁又號龍泓山人錢塘布衣  
有龍泓山館詩鈔

金粟山人逸事 芑堂至平望市閱糕一甌饋龍泓丁  
徵君以奉母作歌云閔姓名糕深雪色到眼團團秋半  
月只少迷離玉兔兒桂露猶凝昨宵濕惟春魯望識香  
秬不用淵明材酒秫浮三浙九法方好堪譬難渝素交  
節賣處曾遊漁釣仙噉來頻見雞蘇佛鬆甘軟淡宜老  
齒易慰貧兒供絜白酒客操戈或偶然茶人把棧宜三  
益韋龍謝鳳競雕藻徒銜華筵一金直虹橋誇目雙暈  
花烟絲播咏加澆蜜何如此糕平且淡似水相與情轉

出張生攜餽登我堂徑尺淺淺踈筠筐鏡花絳紙相映  
掩招人榜子看幾行蘭餘齋專殊勝寺專久此齋無別  
房老夫一笑爲皮置朝邊范餽騰馨香慈顏倚程見莞  
爾婆娑鶴髮神揚揚淡然無味天人糧黃庭有語義允  
臧老人食之壽而康感生之饋足慨慷攬筆作歌嗟學  
荒一雪忽霽開朝陽歌成轉覺情蒼茫獨立矯首風吹  
裳慈烏啞啞青天長芑堂錄歌一通付市壽諸梓今市  
閱糕者人人得讀徵君歌矣以風世勸孝不獨爲閱糕  
紀事徵君見之書跋於後云余作此歌有愧昔人多矣  
字亦漫浪過甚張生芑堂便爾裝治蓋其至性不在詩



與字耳可敬可重海內有心人定識其人蓋吾昔堂亦未易遽識者

按敬子健字誠叔亦能詩如蘭溪換船乘月抵雙溪詩蘭陰城邊漁火紅孤篷單槳搖霜風羣山隔岸靜如睡氣象慘淡經營中須臾林際日光起倒轉星河落波底村墟何處夜歸人犬作豹聲聲不已等句殊佳惜不永年而卒

施安

安字竹田號石友亦號南湖老漁仁和國子生有舊雨齋詩

南宋院畫錄施安題楊妹子題馬和之畫東坡詩意侍郎烟墨散榛蕪曾寫東坡入畫圖想見清吟攜笠屐

雪堂秋色晚糝糊

國朝兩浙詩鈔 施竹田烟雨樓詩云旅泊逾三宿南湖晚更游白雲孤塔迥寒雁一城秋傍水聞吹簫依人賦倚樓蘆塘蕭瑟處爲我寫清愁

陳 皋

皋字對鷗仁和人

蓮坡詩話 對鷗詩淡而彌永歲暮卽事云羈緒宵來頗未降空階獨繞影成雙一堆老雪明如月賸供詩人牢落窗此深得淡中之味者也

陳 章

章字授衣號竹町錢塘布衣著有孟晉齋集

雲護齋詩話

竹町館於廣陵馬氏旣而爲贅婿遂家

於揚間歲一歸省墓握手道故外卽出新篇見示質而不俚新而不巧兀稟排蕩直闖唐人之奧求之知交中罕有其偶

國朝兩浙詩鈔

陳竹町有同厲樊榭話吳興舊游詩

云春深陳迹已漫漫爲話蘋香憶碧瀾四月桑陰門巷綠半城溪色市橋寒老漁舉網銀刀出少婦繅絲雪繭殘果有心期不相負三間水閣未應難

按詩以清深淡遠爲上雄健豪邁次之妍麗雕鏤爲下余向持此論自樊榭竹町以外罕有知者乾鑿戊

寅客邗江得遇授衣欣然有鍼芥之投維時秀水蒹  
秋涇亦痛闢鉛華力追古淡授衣館馬氏玲瓏山房  
秋涇主張漁川家余遂與鄭板橋金壽門張軼青閱  
蓮峯陳對鷗暨授衣秋涇每月聯吟數次以漁川爲  
東道主極觴咏流連之樂數年後授衣秋涇相繼云  
逝諸君亦凋謝殆盡不勝舊雨晨星之感授衣曾有  
句云古澹無華始是詩其好尚可知矣卻叔也言秋  
涇於詩銳意磨鍊得咯血病而詩境益清深亦實錄  
也

### 吳穎芳

穎芳字西林仁和布衣有臨江鄉人詩

隨園詩話 杭州布衣吳穎芳字西林博學多聞嘗自  
序其詩曰古人讀書不專務詞章偶爾流露謳吟僅抒  
所蓄之一二其胸中所貯淵乎其莫測也遞降而下傾

瀉漸多逮至元明以十分之學作十分之詩無餘蘊矣  
次焉者或溢其量以出故其經營之處時露不足如舉  
重械雖同一運用而勞逸之態各殊古人勝於近代可  
準是以觀予嘗試武童見有開弓至十石而色變手戰  
者曉之曰汝務十石之名而醜態盡露何若用五石六  
石之從容大方乎頗與吳言相合 西林與杭厲諸公  
同時角逐及諸公俱登科第而西林如故也故咏筍腊  
結句云回頭看同隊一一上雲烟又答客至曰田間住  
却攜鋤手來與諸公話白雲

張雲錦

雲錦字龍威號藝舫又號鐵珊平湖國子生有  
蘭玉堂正續集

小有天園紀畧 張雲錦字鐵珊平湖人宿小有天園  
有詩云晝勞夜以寧茲獨殊恆蠻面山設匡床浮翠擁  
藤枕池光忽明幃林端月高引叢篁發清奏新涼霍煩  
疾情得神彌恬俄接華胥軫

國朝兩浙詩鈔 張鐵珊嘗與厲樊榭同賦鬪蟋蟀用  
韓孟鬪雞聯句韻云秋氣感而生養銳早相待物性本  
善爭人心藉得彩燈下鳴偶然墻邊攫殊殆誰信風露  
中而有王孫在舊髻堅旣戟鼓翹利於鐵初馬貯冷盆

旋卽更爽塏不嫌狀微陋先覺氣礪磊兩雄忽相遇一  
戰約難改額廣橫金絲齒粲掀玉確搏擊力無餘衝突  
勢愈倍高足善超距弱肉將赴醢卷甲趨未甘踰垣避  
先餒種類頗稱繁輕重詎受給捷如刺傀政神若推鄙  
亥將爲知己死負亦非其罪橫草何人功登臺汗欲浼  
所嗟好勝心不惜購重賄游手教搜羅客船到瀕海四  
忌犯何曾再角興寧怠殺氣動無端機心暗啟乃旌之  
以三花雜之以五綵同類反見戕作歌奚獻凱仰闕罷  
攻秦丸泥類封隗孕此屬多事吾欲聞真宰盧賦與賈  
經雖存詎足採

王曾祥

曾祥字麟徵號茨檐仁和諸生有靜便齋集

隨園詩話

吾鄉王麟徵秀才名曾祥工古文不甚作

詩而五言獨工如星芒林際大雪滴晚來踈慰某落第  
云曾說捐金能市馬俄聞買櫝竟還珠

沈潛

潛字心韶號晴山仁和人  
有晴山詩草

湖墅詩鈔

晴山乃孝廉宿東之孫一生狷介畫類徐

文長諸子亦皆能詩孫可堂有弟奕堂客都門寄詩與  
兄可堂和之晴山卽次韻以贈可堂曰今人中見古之



人隨分尋歡不計貧黃卷幾篇無長物青山十里有閒  
身棠開庭院春風樂竹映軒窗秋月親大笑掀髯忘勢  
利愛君瀟灑好丰神

王德溥

德溥字容大號澹和仁和人

湖墅詩鈔 王澹和詠浴鵝有翻身穿細荇側翅入清  
波之句華道人爲之作圖金顧裴題一絕云籠內羣鵝  
尚有無年深休怪墨池枯而今却被詩家賺側翅翻身  
上畫圖澹和自題金秫田所貺畫云高人用晦世莫測  
雖擅能事不爲名我識畫師亦無數獨有金丈天機清

灣梁逸興滿胸臆詩書妙理紛縱橫終歲作詩不作畫  
偶然揮灑雲烟生層山複水望不竭間以老木開香城  
倚崖列屋孰上下過橋野老誰逢迎咫尺直將通萬里  
悄然相對心鬼驚漫言知希我可貴絕藝定有識者評  
但問何處是君畫青鞋布鞵其行行又題讀畫舊廬云  
好景當窗牖如披圖畫新烟雲驚屢變魚鳥善長親不  
負看花屐無忘漉酒巾扁舟門外泊時有賞詩人

孫以華

以華字奕堂一字藻川仁和人以榮弟

湖墅詩鈔 奕堂困於小試鬱鬱有年三上長安一遊

荆楚逗遛同宗介亭岳州守署中復課讀太白樓三年  
暇卽吟咏比歸稿有千數其賦鸚鵡洲一篇云莫辨由  
來鸚鵡洲千年故蹟幾沈浮金沙有樹供懸望赤壁無  
人記再遊水面光搖天半月江心飛過浪中舟遙知此  
地埋名士漠漠烟波動客愁

金淳

淳字麴農仁和人

湖墅詩鈔 里有蔣貞女幼字丁右文之子璞山璞山  
十九而歿貞女誓不他適依父兄以老麴農有詩云足  
不踰三徑心難負一人暫依兄嫂住深念舅姑貧絕意

除環填關情到米薪有時還翦燭覓夕話艱辛

姚世簡

世簡字象九號樸夫湖郡增生有蕩汀詩鈔

國朝兩浙詩鈔 吳鎔叙蕩汀詩曰蕩汀初不以詩名帖括之餘選聲覓句反覆沈吟有詩癖焉人傳其憶故居一絕云委宛溪山入望斜一竿烟水澹爲家三秋只恐多風雨零落窗前曰蕩花

胡裘錞

裘錞字西垞會稽諸生

畫漁餘話 同邑胡西垞維揚夜泊云十里樓臺人鬪

酒一城燈火夜吹簫姚江徐藍膝有吳江道中云未晚  
沿江燈火上十家樓館九吹簫皆落墨不多而於繁華  
風俗已寫得有色有聲令人神往 何草不黃秋以後  
伊人宛在水之湄此胡西垞咏蓼花句也近被一蚶學  
究攘爲己有且將宛委山人秋海棠絕句亦掠入其私  
橐齊邱而後何代無賢

汪浚

浚字在郊錢塘人槐塘弟

國朝兩浙詩鈔 南屏淨慈寺虛上人畫嘗作古木  
新篁圖汪在郊題詩云畫貴意取意不窮得此意者惟

恆公手活筆勁寫喬木修枝倒撲宛游龍新篁迸石裂  
苔蘚烟梢上裊欹風轉不垂竹仰意態奇似離而合情  
纒纒溪環如玦水急流遥峯浮翠長幽悠我欲卜居苦  
難得聊張此幅作卧遊憶昔一宿饌伊蒲南屏山下恣  
清娛太息緇塵人化鶴廿年陳迹感斯圖

樓 錡

錡字于湘錢塘人

青瑤詩話 錢于湘寓吳中幾無家矣自維揚歸閩門  
感而賦詩云年年踪跡感漂蓬冷落柴門烟雨中燕子  
歸來迷舊壘桃花何處笑春風未幾病歿

林 廓

廓字伯黃號轡之黃巖人

二台詩錄 轡之能書工詩尤長五七絕嘗索其遺稿  
不得故僅登一首詠水仙云仙葩未許等閒看須信丰  
姿白玉寒耐雪有情凌笑詠凌波無力倚闌干乍疑漢  
女相逢好似對湘妃欲畫難銅洗貯餘香滿室素心庭  
許伴芳蘭

厲 鵬

鵬字子山錢塘人鶚弟

樊榭山房集 題三弟子山遺詩後并序云予少遭孤

露弟僅六齡零丁危苦相依至今凡二十一年去年幸  
弟舉一子今年十月十日弟忽遘疾夭亡痛可言邪檢  
故篋中有手書雜藥方十數紙後有庚戌除夕一絕句  
云已響千家竹將殘一夜燈不知窗外雪漠漠硯池冰  
弟素不能詩其辭似工者豈有夙慧邪第二句竟成劉  
希夷花落之讖抑有物焉以憑之邪吁可痛也因忍淚  
成二十字題後付孤姪黼收藏詩曰人逐殘燈滅行留  
斷雁孤年年年盡後豈有淚模糊

吳 漢

漢字鑑南尊萊子商寶意甥



隨園詩話 商寶意有甥吳鑑南潢爲詩人尊萊之子亦能詩嚴海珊贈云何無忌酷似其舅嚴挺之乃有此兒真巧對也鑑南以主事從溫將軍征金川大軍潰於水果中礮墜溪死未死時知不免寫詩兩冊以一冊付其妻叔周某逃歸以一冊自置懷中今秋帆先生所刻者周帶回之一冊也與程魚門交好程誦其陶然亭云偶着芒鞋策策行到來心跡喜雙清短蘆一片低如屋空翠千層遠入城野曠每留殘照久地高先覺早涼生老僧解得登臨意勸聽殘蟬曳樹聲贈人云波雖無恨終歸海人到忘情却省才與乃舅寶意人因福薄纔生

慧天與才多恰費心之句相似

張沅

沅字畏廬號漁仲閩人遷錢塘有頻迦集

國朝兩浙詩鈔 丁傳云畏廬愛杭州湖山之勝卜居  
錢塘江上甕殮不給朗吟如出金石每得險韻奇句必  
命兒子持與丁龍泓和之龍泓知其有擊鉢之好輒次  
韻付其子報命不數日積卷盈寸題曰南村侶和鴛湖  
陸雲軒愛之爲刻其半讀者歎不得窺全豹惜哉又能  
散體文丁氏藏書最富多爲題跋如石濤畫說龍泓改  
名苦瓜和尚畫語錄乃爲手鈔而書其後其見於鮑氏

知不足齋叢書中者又一斑耳玉池山看紅葉詩云亂  
迷秋眼放晴巖魚鱗鸞玃擬大凡斜照一天常借艷腥  
膏于炬笑徒饞錦官雨夜凝葩朶蜃島星槎鬪寶函若  
與題情人再見相思凭仗莫教銜

曹芝

芝字莖九號荔帷錢塘人

丁龍泓印譜 芝里印丁龍泓刻石并跋云荔帷鮮得  
老夫篆刻無法之法以詩來謝相應之速且要次韻并  
刻印石亦佳話也因如其請曹倡爛銅破玉好光輝多  
謝神斤大匠揮不比三年刻楮葉先生應笑宋人非丁

次韻石章刻就石生輝絕似朱弦信手揮却笑解人千  
未一說難吾久是韓非戊寅三月敬老人記

符之恒

之恒字聖幾別字南竹仁和諸生有秋聲館詩  
蓮坡詩話 秋聲館吟稿一卷仁和符聖幾之恒遺詩  
也聖幾爲予友葑林從姪學詩於厲徵士樊榭具有宗  
旨年三十三天卒樊榭序其詩曰澄汰衆慮清思眴冥  
松寒水潔不可近曉誦之信然尤工五言如燭光來樹  
背人語到堂襟草長橋西路菱枯水上田花寒斜更斂  
香潤斷微生鷗寒依葦立山靜見烟生小橋連野水虛

室貯秋寒寒烟棲木末活水齧城根等句絕似咸平處  
士天不永年未見其止惜哉

林文元

文元字阮林號蓮山海寧籍仁和國子生有未  
然小稿

雲護齋詩話 林氏世以醫著名阮林少而習之自靈  
樞素問以及諸書余見其日置几案旁問之無或遺可  
謂三折肱矣及出而治疾往往多不效反不若粗解藥  
性賦者居然盜名欺世以終其身也詩格簡鍊學昌黎  
具體而微者

蔣宏道

宏道字雪樵仁和布衣

雲護齋詩話 雪樵一月必一展親墓世稱其孝樊榭  
有歲暮行答雪樵云忽傳白髮杜陵叟落手長歌在連  
紙自言賦命坐天窮爲災頃遇吳回氏三間老屋付無  
何數簣殘書嗟已矣且須逃債類謬臺只合忍饑如甫  
里蕭條身事集闌年欲喚星奴行且止據此則雪樵之  
老而益貧可見矣

馮一鵬

一鵬字止園錢塘人著憶舊遊詩話

憶舊遊詩話序

沈廷芳撰

馮止園先生自西陲以暨北徼

其遊履爲最遠當其短衣匹馬莽莽行沙漠間所至城郭關塞及山川之雄傑風俗之怪變皆以廣其見聞而徵其得失可謂壯矣然猶以爲先生之得賈人逐客皆得共而有之至於過通天河則識上流橫鎖之異尋軌井則識山泉忽湧之奇瞻長白山三江源及十二屏風則知 皇朝發祥之大且遠志鄂爾多斯丁查拉使及蒙古諸國則知屬國內附之多且誠况夫歷河西四郡而謂西番不可不防經船廠要區而謂刑徒日繁宜約束之必嚴而教督之有道然後知先生遠覽絕識其胸

次磅礴鬱積微露其緒於舊遊一編中不獨撫鱸魚  
雪蓮番瓜標舉瑣屑爭一時博物之名已也卷分上下  
共斷句百餘首風雅可誦爲序而歸之

馮慶雪

廣雪字纘修號瑤田臨海人

三台詩錄 君滴水灣詩云泰公篆傑士討賊死空山  
血戰洪洋渚竟歸滴水灣睢陽殘壘沒峴首斷碑間祠  
墓今何在荒涼淚欲潛自註當時父老歌云黃山環滴  
水灣泰公討賊在此間東樓洪洋西草菅賊旗搖曳愁  
人顏泰公討賊何時還又遊崖潭弔古詩云削壁峻峻



歷瑣潭則娘從此碎冰肝兄能報國揮長劍妾自完身  
赴急瀾玉骨已隨溪月冷霜魂還逐水雲寒崖潭寂寞  
空山裏誰作清風嶺上看宋末黃巖卒大昌起兵抗元  
既戰死從妹則娘攜妹及大昌二女俱投崖潭死村中  
婦女從死者不可枚舉郡縣志失載賴瑤田一表章之

陶章煥

章煥字石湖號菊坡會稽人增貢生

海嶼詩話 菊坡先生漂母墳云人間豈少王孫輩難  
起千秋隻眼看與江陰翁朗夫照士甘餓死今還有女  
識英雄古所無同一感慨而筆較聳拔又五十初度有

句云縱然便死原非天若竟長生也聽天其曠達之致  
真率之情雖香山東坡無以過也

金 鎡

鎡字雙堃山陰人布衣

詩衡 余最不喜瞿宗吉咏物縱使象形惟肖亦屬泥  
塑木雕毫無解悟每憶雙堃咏蓮蓬云何事淒涼心獨  
苦爲誰憔悴首如蓬靈活非常纔是白描高手

鄔希文

希文字亦范餘姚人諸生

越風 亦范工文章善琴畫亭亭玉立贅居吳門曾爲

余寫中泠試茗圖自題其上云憑將大落墨寫出小遊  
仙丙辰應制科余贈以詩曰何人豫掃迎門雪看爾新  
銘克敵弓用周必大洪景伯應宏博科事

趙舟

舟字施遠京陽人

金華詩錄 施遠落落自好未嘗窺戶外城市中無其  
跡也詩中頗有靜境五言如庭外幾花落池頭一鳥鳴  
鴉翻江樹月魚動石潭星一時傳爲妙句

祁曜徵

曜徵字季朗山陰人諸生有卧士集

柳亭詩話 邴季朗曜徵爲忠愍公從孫莫年嗜古落  
筆迴不猶人赴長沙趙使君約遂客死其遺稿爲沈梵  
陵手輯曾見其自常山至玉山道中書景詩十四首偶  
摘其四有曰籬落翠微間溪山白雲裏春曉逐東風踏  
花行數里空山曠無人花開復花墮白日溪流寒照我  
橋上坐獨樹看落花空山聽啼鳩何時向此中夜弄松  
間月蕭蕭叢竹深沿溪幾家住日暮起墟烟蒼茫影高  
樹俱有出塵之致而享年不永惜哉

劉鳴玉

鳴玉字封山號鳳岡山陰人諸生

畫漁餘話 鳳岡楚遊時有遇風律句云欲知舟過道  
士泐絕似兵鏖和尚原緇黃兩地名適獲其偶令人閱  
之失笑其梅芝館集外又有羣盲評古圖七古一篇亦  
涉筆生趣使楊誠齋復起定當把臂入林

謝秀嵐

秀嵐字南銘號雪漁餘姚人

山居詩話 謝雪漁咏重臺紅梅七律豈緣冷淡少人  
看玉骨層層與換丹只七字中梅字紅字重字無意不  
到又題趙孟頫松雪讀書圖不知曾讀離騷未錯認王  
孫是恨人何等風致言下却使趙孟頫通身汗下汪津

夫作草堂謝南銘爲題四言八章中如清琴月上殘花  
雨餘江濤山來河流天瀉慟絕窮途一壺誰假雞犬村  
通參辰星各愾焉詩成屋梁月落卽陶公停雲且當避  
之

按雪漁詩學最精今亡三十餘載矣近日姚江風雅  
鮮有繼之者其西湖竹枝云願郎心作湖水平儂是  
湖山一點青儂在郎懷山在水在池風浪自亭亭又  
咏新燕云簾外一聲聞軟語花前雙影見初飛又贈  
燕云眼前多少興衰感話到斜陽尚未歸皆屬宋元  
人佳境也從來新婦曰新媳婦越俗詭爲新新婦故  
娶婦者曰娶新新婦看婦者亦曰看新新婦雪漁詩  
種得桑秧賽種種魚三春活計賴柔紵明年要娶新  
婦屋後添栽五十株因俗例頭年媳婦必  
養蠶名新婦蠶雪漁可謂善寫土風矣

劉文蔚

文蔚字豹君號柟亭山陰諸生

菊坡詩話 劉豹君文蔚讀大風歌五律云將將輪  
準乾坤已洗兵無端思猛士應悔殺韓彭三族冤彌慘  
千秋恨莫平風雲空際會不忍說功名上四句就作歌  
者心中想出下四句從闕歌者眼中看來俯仰低徊淋  
漓悲壯

盧元璧

元璧字璧人東陽人布衣

盧璧人行狀 居恆奉朱子家訓爲圭臬又以古人戶  
樞不蠹流水不腐及筋力不運易病心思不用易枯等

語揭諸座右時誦古句以勗家人云菜羹切莫和油煮  
留點青燈照讀書一生布衣疏食床褥弗用軟厚曰庶  
常惺惺其勵志大都如此李霽園序其詩謂以道學而  
兼風雅

盧光寧

光寧字子安東陽人布衣

雅溪詩存小傳 子安詩不甚求工然五言如梅蘂千  
巖競松花幾樹增闕人成老叟讀史獲良朋學仙閒卽  
訣辟老靜爲功見真樸之趣

童鈺



鈺字二如改二樹號璞巖又稱二樹山人會稽

布衣

沐雲詩話 璞巖讀漂母傳云一飯能輕與斯風便足

尊偶然憐餓客不必識王孫舉世還相薄何人可共論  
從來真國士不屑受人恩其第三四句翻案新奇

隨園詩話 上虞陳少亭愛童二樹五言爲摘句圖仿  
阮亭之摘施愚山也余尤喜其早烟山際重春霧水邊  
多看花蜂立帽問水鷺隨人晴流鳴斷壑山影卧空田  
數聯童病中夢二叟自稱紫閣真人浮白老人手牽鶴  
使騎童辭衣裘未備真人曉以詩曰昔從赤身來今從

赤身去一絲且莫挂何論麻與絮不若五銖衣隨風自  
高舉童答云多謝羣真招我歸殷勤持贈五銖衣相從  
化鶴我真願要傍先生隴上飛吟畢求寬期紫閣真人  
立二指示之果越二十日而卒

按二樹屢應童子試不利遂棄舉業專攻詩古文客  
大梁茶久性豪俠不爲家計賣文錢隨手散盡卒於  
邢江嘗於暑月畫梅一幅題其上云十丈炎威十丈  
塵毫端僭見雪精神莫嫌拂袖多寒氣我人間避  
熱人蓋自道其衷非獨爲梅花寫照也又有關山牛  
馬走風雨蟪蛄鳴之句爲人膾炙二樹亦自愛之與  
同郡劉文蔚沈翼天姚大源劉鳴玉  
茅逸陳芝園結社聯吟稱越中七子

盧懋臺

懋臺字雲瞻東陽人

金華詩錄 雲瞻遊水竹庵訪幽谷上人頷聯云谷響  
故聞人語谷潭清偏照客心空頗稱幽靜

鄭驥路

驥路字邦雄號且山上虞諸生

海嶼詩話 且山生平酷嗜溫李每勸學者誦詩輒舉  
李之此日六軍同駐馬當時七夕笑牽牛溫之回召樓  
臺非甲帳去時冠劍是丁年風捲蓬根屯戊己月移松  
影守庚申爲式晚年應歲試學使者爲涪陵周海山大  
司馬試題木葉微脫有無聲月滿樓之句使者亟賞之  
議者以爲詩雖工頗有鬼氣是冬果逝遂成詩讖當時

比之曙後一星孤云

曹陞慶

陞慶字海鑑上虞諸生所著有自鳴集

海嶼詩話 海鑑詩字字錘鍊而出如登蘭苕云連綿  
裂地軸盤屈迥天光沓湖齧危石鎬磕駭礪碾疑是夸  
娥負又恐巨靈傷曲磴懸飛泉灑落破陰荒之類頗規  
撫昌黎半居孝友往往形諸歌詩

韓士儉

士儉字豐毅號楓谷上虞人布衣

海嶼詩話 楓谷偶讀宋荔裳英雄旣失志往往成酒

人句因作四飲以解嘲并各製小序以冠其篇其一云  
飲韻事也儻父交相得色失之遠矣孟萬年識此中趣  
何若雙柑鶯舌不俗人耶韻飲宜人哉曰士可百爲所  
不可惟俗况復舉卮時而乃多刺促仲若高潔儔雅志  
遠榮辱春鶯啼一聲大斗貯醺醪佐以雙黃柑深林坐  
新綠嘈雜笙歌繁拜起縹緗東鶯燕遞主賓聊浣此塵  
毒千秋誰知音臨風仰高躅其二云袁中郎稱天池山  
人文如口種出土如寡婦之夜哭英雄失路托足無門  
之悲而其傲睨絕世尤在烏巾闌轅門時飲以全傲超  
超劉阮矣次以傲飲於越佳山水靈秀鍾山人性稟鮮

僊匹出語驚等倫東南制府開威靈侔天神橫巾闖菜  
戟醉眼眯主賓雄詞動至尊座客如蠓塵梟奪帳下兒  
餘瀝沾衣襟青藤隨秋風令名今猶新寄語諸飲徒惟  
天成酒民其三云工部雖遭棄絀隴蜀流離奚至乞一  
絲兩絲哉田父泥飲歡洽終日樸存勿僞也文章光焰  
飲道高美泥飲何傷少陵遭貶棄零落隴蜀間溯昔梁  
宋游盛時難追攀東風吹田家花柳紛柴關瓦盆滿社  
酒共酌忘村頑酣適竟晨夕醉醒心閒閒雅負侶稷契  
田父欣往還真慙何失身歡顏庇區寰杯酌密沈械橡  
栗寧空山其四云馬賓皇憤激西游新豐主人不識獨

酌一斗八升辱而飲與飲而辱河漢乎辱飲有微權也  
長貧自朝夕如鞴困飛翰大造付坎壈奚敢萌他端壯  
夫惜恥辱往往摧心肝馬生古倜儻西游中辛酸姑以  
杯中物一洗行路難新豐天茫茫白眼萬里寬浩落縱  
升斗市子良可歎佳哉常舍人成乃明良歡范蘭云其  
氣調高絕惜不令宋荔裳見之又云小序已是四篇公  
穀文字

范蘭

蘭字石書上虞諸生

海嶼詩話

胡他山跋范石書詩云石書究心樂府所

擬五言古詩言言魏晉卽暗中摸索亦不失爲杜陵夔州以後作近體清雋直追大歷諸家集內有和陶燕公八十自壽次韻八首依原體編用王建律句人皆欲得長年少無奈排門白髮催云云陶激賞之自注云陶自號丹邱中人僑居蕭山人日生辰

沈仲臨

仲臨山陰人

國朝詩話 仲臨久客不得志遺詩兩卷多淒苦之音舟中聞鴈云征鴻嘹唳向南飛回首家鄉淚濕衣此去關山無定所難將消息寄君歸可想見其意



周汾

汾字蓉衣杭人

隨園詩話 杭州周汾字蓉衣咏春柳云西湖送我離家早北道看人得第多不脫不粘得古人未有惜客死於清江

吳修齡

修齡字好山山陰人著橡村詩鈔四卷

隨園詩話 山陰吳修齡有句云雁將秋色去帆帶好山移人因呼之曰吳好山好山晚晴云江皋收宿雨征雁卷簾聞野戍空千里高秋無片雲海明天落日風響

馬歸羣賦罷衫巾岸應書白鍊裙與胡稚威交好兩序  
皆胡所作胡和其寒夜一聯云凍苦星辰白霜明鼓角  
乾真乃不愧孟郊

炙硯瑣談 會稽吳象超尊萊小阮好山著橡村詩鈔  
四卷尤工小詩五言如白雲留晚磬黃葉卷歸樵小雨  
止復作片雲行欲還七言如空院落紅中酒後曉山橫  
碧卷簾初暮雲抱郭霾紅樹寒雨連江凍白鷗皆於研  
鍊中別具丰韻

畫漁餘話 吳好山咏石牀云幽居避軟塵虛牀鑿危  
壁睡去巫山雲覺來一片石劉鳳岡題竹嘯集云香巖

擊竹時悟心在何處莫是聞鼓聲肚饑且歸去此兩首  
詩皆妙通禪理兼畧帶詼氣

徐溥

溥字雨亭湖州人

隨園詩話 湖州徐溥雨亭在金陵爲人司織局每吟  
詩與機聲相和錢塘竹枝云芳心脈脈夜迢迢郎在江  
南第幾橋欲寄尺書寫腸斷西湖只恨不通潮落盡楊  
花郎未歸空煩刀尺製羅衣人前怕卷珠簾看蝴蝶一  
雙相對飛虎丘題壁云好景半藏峯頂寺美人多住水  
邊樓

顧牧雲

牧雲嘉興人

隨園詩話 樵李顧牧雲流寓襄陽一日獨遊隆中憑  
弔武侯遺跡避雨卧龍岡見山腰有茅庵一叟出迎風  
貌奇古正欲與言則菴側蹲一猛虎顧驚且仆老翁笑  
曰子無懼此虎已歸依我作弟子矣且曰知子能詩盍  
題數言見贈顧辭以目疾翁取几上芋與食命瞑坐一  
刻開眼果察秋毫顧異之卽題石壁云一衣一鉢一軍  
持雲水天涯任所之莫笑道人無伴侶新收猛虎作童  
兒偶向山前咒毒龍風雷欲拔萬株松須臾明月當空

起歸到茅檐打晚鐘翁留宿巷中臨別曰明年正月上  
寅日吾開丹爐與子服一粒體輕成仙勿忘此囑次年  
及期赴約行未十里風雪大作山無行徑又恐老翁不  
在猛虎獨存悵悵而返後十餘年日漸昏體漸衰悔從  
前向道之心不勇又賦詩云老堪嗟駐顏何處覓丹砂  
老堪惱五官雖具無一好凋零渾似過時花憔悴不殊  
霜後草手頻戰頭屢顛行來蹙蹙足不前自憎容貌改  
人惡性情偏吁嗟乎我今八十已如此愁殺蓬萊千歲  
仙

柴東升

東升致遠兄杭人

隨園詩話 丙辰春余欲西行苦無路資適耕南之兄  
東升就館高安挈余同至署中贈金一笏裁得裹糧至  
粵一路舟中聯句過鄱陽湖野有樹大可蔽牛已朽折  
委地矣旁一小枝穿根而出高十丈餘相傳明太祖與  
陳友諒戰時此樹代受砲故封爲將軍至今尚有燒灼  
痕柴首唱云大樹兵火餘枯根尚委地余續云曾抱紀  
信忠一死代漢帝柴云輪囷根盤存焦枯枝葉葉余云  
叢叢莓苔痕鬱鬱霜露氣柴云祖幹扶桑傾孫枝小龍  
繼余續云穿出盤古墳猶作擎雲臂東升歎曰二語險

絕可不必續成矣彼此一笑而罷

凌雲

雲字香坪烏程人

隨園詩話 烏程凌雲字香坪少有吳門紀事詩極酒

場花徑之樂晚年就館於李參戎家鬱鬱不得志而卒

胥門感舊云金閭會度五清明選勝攜朋取次行楊柳

堤邊調細馬杏花村裏聽嬌鶯春風久負青山約舊雨

難尋白鷺盟今日胥江重艤棹斜陽芳草不勝情過分

水龍王廟云汶河西注水汪洋南北中分界兩行從此

空彈遊子淚隨波流不到家鄉他如雨積山多濕烟收

樹滿村魚跳驚燭影雞唱亂琴音俱有風味

章袁梓

袁梓字蘄齋錢塘人

隨園詩話 表弟章蘄齋秀才名袁梓性迂碎有潔癖  
好神仙吐納之術自謂可長生而卒不驗睢陽客興云  
幾度飄蓬動客嗟况逢遲日感韶華堦前杖響誰看竹  
月下烟飛自煮茶遊騎踏殘零露草幽禽含過隔墻花  
尋芳孺子知時節也着新衣到酒家對雪云素光燦爛  
映簷楹未許踈狂歎獨清隔夜江山都改色連朝猿鳥  
並無聲風飄墮瓦寒冰響鼠滅殘燈外戶明畫帳香茵



初睡起舉頭錯認是天晴其他佳句云有梅人坐靜踏  
雪鶴行徐風枝挑瓦墮石笋引藤纏宵柝暗驚孤客夢  
寒雞時作故鄉聲蜂能負子應知老燕屢升堂若賀貧  
花香夾路人歸緩水影搖天月出遲投杖驚逃穿屋鼠  
圍棋引進過門人俱妙

任 炎

炎字司皞號西亭蕭山人乾隆壬午舉人

海嶼詩話 西亭詩多真樸唯咏物則不脫不粘掃盡  
瞿宗吉謝宗可習氣曾憶其咏秋海棠云勻來顏色點  
秋霜彷彿殘霞簇錦塘暮雨尚淒紅燭影綠陰空貯翠

雲箱可憐永巷悲陳后無復高唐夢楚王一種風流顛  
頽甚豈宜重問碧雞坊秋草云華年風景尚依依臨水  
登山賦曰歸蘭蕙春風前度遠蒹葭秋水昔人稀殘螢  
光散明珠串寒蝶香銷舊粉衣太息里居張仲蔚蓬蒿  
長映竹簾微清麗綿芊當是問津溫李

周立

立字竹生東陽人有課餘草

課餘草序

郭涵撰

先生善丹青課餘展絹素門壁間做

石田諸公法以寫其胸中丘壑卽以繪於景者發於詩  
使人讀之想見其畫某景卽某作也

風雅閒談 竹生清明詩桃花顏色年年好看花人道  
東風巧一度吹開一度春可惜人顏吹易老君不見芳  
草萋萋冷墓門臨風一滴欲銷魂歸去花前回首處牧  
童短笛又黃昏首四句得比興之法殊覺情味遙深

全浙詩話卷四十九終